


# ISOL ARO MANDE

---

**Mertyn Temple**





# **ISOL ARO MANDE**

KRISTIAN BEBERA·ANIKO ALTUAE  
UIATNA SEGIMIN KI·TAP

*BY*

**MERFYN TEMPLE**



## AGANCHENGANI

Book Clubni gitamgipa kittapko gisikni bidingo dakehakaniko man'gen ine bebera'ao bian baksa peraigipa sakantinan sualatenga. Ia kittap Isol aro mandeni nangrimaniko ning'tubate uina dakehakani ong'gen ine chinga kardonga. Aroba iako paraigipa sakanti, iako peraianichi nambata janggi tunganio tangna dakehakaniko man'gen ine chinga kardonga.

United Society for Christian Literature, London, England, chingna, Key Book Series-o Englishchi segimin (God and Man by Merfya Temple) kittapko Archikuona p'skana on'ahani gimin chinga uamangko mitela. Abachenge Mr Karbenson Sungma iako p'skahani gimin chinga uko mitela. P'skagiminko Mr Pinsonath S. Momin aro Master Jibonsing Areng sim-sakbee nipiltaiahani gimin uamangkoba mitela. Baditaba chang Type dokna garakaha iana Book Roomo kam kagiparangko mitela.

**James M Wood**

# JAPANG KATARANG

## Odai. I.

ISOL.	Jak.
MANDEA ISOLKO UINA MAN·AMA ?	1— 8
ISOL MAI GITA DAKA ?	8—14
ISOL MAIKO DAKAHA ?	14—19

## Odai. II.

### MANDE.

MANDEA MATBURUNGMA ?	20—24
MANDEA BE·EN BIMANGSANMA BA	
MANDEO JANGGI DONGAMA ?	25—28
SAKGIPINRANG BAKSA NANGRIMANI.	28—30

## Odai. III

### PAP.

PAP A·GILSAKONA MAIKAI NAPAHA ?	31—36
PAPNI BITE.	36—42
PAP JELROROGIPA SABISI ONG·A.	42—49

## Odai. IV.

### KA·SAANI RENCSI.

MANDE AN·TANGKO JOKATNA MAN·JA.	50—52
JISU KRISTOA SAWA ?	52—59
JISU MAIKO DAKAHA ?	59—62
JISUNI SIACHI AN·CHING MAIKAI	
JOKANIKO MAN·AHA ?	62—67
DA·O ANGA MAIKO DAKNA NANGA ?	67—75

---

ODAI. 1

## ISOL.

### MANDEA ISOLKO UINA MAN·AMA?

Mandea Isolko uina man·ama ine an·ching sing·on, Isol donga ine chanchiesa sing·aha. Isol dongjagenchimode, Isolko uina man·ama ine sing·anin dongjawachim, maina, an·ching donggijakode uina nang·anin dongja aro donggijakode uina joton ka·rongja. Indide, Isol donga, aro a·song·ni manderangan Isol donga ine agana.

Beben Isol dongja ine science saki·rangchi mesoka ine mitam manderang chanchia. Indiba chongmotko aganode, bang·a scienceko uibegipa manderangan Isol donga ine agana. Da·o an·ching Isol mai gita daka, an·ching uko uina man·ama, ia sing·anirangko sandie nina.

Indiba ia sing·anirangni gimin sandina skang minggipin sing·anini gimin chanchichenggen. Ia sing·ania, salantini an·chingni janggi tanganio an·ching saksa

sakgipinko maikai uia? Anga indake aganode, "Ua mande angni ripeng ong'a." Na'a aganaba donga, "Na'a uko nangni ripeng ine maikai uia?" Mande saksako maikai uina man'a uani gimin sandie nina.

**Mande saksako uiani cholrang :**

Mande saksako maikai uina man'a ine an·chingo saoba sing·ode, mande saksako ia cholrangehi uina man'a ine nikgen. Ia cholranga, uni dakgimin kamrangko nie, uni gimin manderangni aganako knae, aro bon·kame uko gronge agangrik·anichi.

Mande saksako uni dakgimin kamrangko nie uina man'a. Chanchiatna gita, mande saksani kamko an·ching nikaha ine chanchibo. Chanchichiye ua nok te·sako rikaha. Ua nok dal·bea ong·jaoba, indiba, uan ua biapode nambatgipa ong'a. Ua nokni krongrang mangraka; kelki aro do·gani pangchakanirang namgipa aro sronggipa bolrangchi taria. Tingku balkoprang mangraka; am·pangko ritchae pina, aro a·kinrang cha·jana gita krongrangko name taria. Indakgipa nokko an·ching nikahaon, maidakgipa mande ua nokko rikaha, uni rikgimin nokko nie ua mandeni gimin aditako uina man'a. Ua simsak-



gipa aro bimchipgipa mande ong·na nanga.  
 Ua changgipa sapgipa mande ong·na nanga.  
 Aratgipa aro bimchipgijagipa mande in-  
 dakgipa nokko rikna man·jawachim.

Chanchichipe indakgipa nokko rikgipa  
 mandeni gimin uni ripengrangni indake  
 agananirangko an·ching knaaha ine chan-  
 chibo. Ua mande nok rikna changa; ua  
 bimchipa aro jeko dakoba gisik nange daka.  
 Ua mandeskana ka·sachaka aro pangnaba  
 mandeska baksa jegrika dongja Ua kak-  
 ketsrang aro mandeskako pangnaba togi-  
 cha·bokja. Indakgipa mandeni gimin in-  
 dake agananirangko an·ching knaon ua  
 mandeni gimin bang·bate uina man·chong-  
 mota. Beben uko namnikgijagipa mande-  
 rang uni gimin namgija agananirang donga  
 aro uamang uko namnikja aro mitchia.  
 Indiba, bang·a manderangni uni changa  
 sapaniko, uni kam gong·aniko, uni ka·  
 saani kamrangko agananirangko an·ching  
 knaon, ia mande changgipa sapgipa, bim-  
 chipgipa mandesan ong·aija, indiba, ia  
 mande namgipa mandeba ong·chongmota  
 ine an·ching chanchina man·a.

Unon chanchichipe bon·kamao an-  
 ching ua mandeko grongahaoa, aro un-  
 baksa agangrikna cholko man·ahaoa, ua

mandeni gimin manderangni agana kata-rang bebechong·mot ine nikaha, aro uko namnikgijagiparangni uko matnange agan-anirang pilakan tol·anisan ong·a ine an·ching nika. Indake mandeni gisik aro kam pilakkon mandeko gronge un baksa agangrikanichi an·ching rongtale uina man·a.

### **Isolko uiani cholrang :**

Isolkoba mande gita chanchie ia ming-gitam cholrangchi uina man·a. Uade ang gita nang gita dakgipa mandede ong·ja, indiba, an·ching uko mande gita chanchie uni dakgimin kamrangko nie, uni gimin manderangni aganako knae aro bon·kamao uko gronge agangrikanichi uina man·a.

Isolni ong·atgiminrangko nie an·ching Isolko uina man·a.

*Salgirang Isolni rasongko aganpraka ;  
Aro bangbangan uni jakni kamko  
mesoka.*

*Git.19:1.*

Angni samtangtangchi duulenggipa, Isolni ong·atgimin aro dakgiminrangko anga niwilwale niode, pilakan nama ine nika. Anga ringna skoa, sambaon grik-

gipa aro rongtal gipa chiringrang donga;  
 okkrio cha·na gita cha·aniba donga.  
 Anga be·enko cha·naskoba Isolni patigimin  
 matburunrang a·gilsako bang·a; aro chi-  
 bimaoniko na·tokrangko rim·e cha·na man·a.  
 Anga a·bao bitchilko ge·oa mikka  
 wadape chabaa aro salni teng·ako man·e  
 dal·roroa. Anga sin·beode wa·al sike chak-  
 na man·a aro mikoba song·e cha·na man·a.  
 Duk sukni salo dakchakgrike janggi tang-  
 na man·na gita anga jik·kim deba·e dong-  
 na man·a. A·gilsako dedrangchi kusi ong-  
 atbataniko man·ana bate darang gipinchi  
 man·ja. Indake a·gilsakko nie mang·mang  
 ba anga Isolni gimin uina aro ua maidak  
 gipa ong·a chanchina man·a. Pilak Isolni  
 ong·atgiminrangchin Isol nama inc anga uia.

Isolni ripengrangni Isolni gimin saki  
 on·anichi Isolko uina man·a. Isolni ripeng-  
 rangni Isolni gimin aganako knatimon  
 anga maiko knaa? Sastroko ra·e porai-  
 on anga maiko nika? Isolni mande-  
 rang Egypt a·songo nokol itako man·e duk  
 ong·engachim. Uamangni ma·ama aro  
 skimako Isol knae, gital a·songona ua-  
 mangko dilchina Moseko okamaha. Man-  
 derang nangan salo Uo dakchakaniko bi-  
 ode Isol pangnan knachaka. Duk ong·gipa  
 manderangko kusi ong·atna an·chingni uigi-

jarangko an·chingna skie on·china Isol an·tangni Depante Jisu Kristoko a·gilsakona watataha. Jisuni nambegipa ripeng, Paul, Nama Katako re·roroe aganprakmitingo bang·a duk aro saknarangko man·ahaoba, Isolni ka·saako aro uni ka·sae dakanirangko pangnan saki on·aha.

Skangni chasongrango Isolni ripengrang Isolni gimin maiko aganaha? Uamangni Isolni gimin saki on·anirangko anga Sastrooniko poraie nie uina man·a. Uamang maiko agana? Isolni gimin saki on·gipa manderang je Kristian doloniba ong·ja maina, Anglican, Baptist, Methodist, Presbyterian ba Roman Catholic doloni ong·naba donga indiba uamang apsankon agana. Uamang indake saki on·a, "Isol kema ka·gipa, ka·sara aro ka·sachakan gapgipa, ka·onangna ka·singipa aro ka·sachaka bang·begipa ong·a." Aroba, Jisuni gimin uni pilak aganani-rangan kakket ong·a ine uamang saki on·a.

Unon bon·kame Isolko gronge un baksa agangrikanichi Isolko uina man·a. Isolni gimin, uni kamrangko nike, uni gimin ripengrangni agananiko knae aditako an·ching uina man·a; indiba, uni kamrangchi aro uni gimin Isolni ripengrangni

aganako knaanichi Isolko rongtale uina man·ja. Unon anga an·tangan Isolko gronge un baksa agangrikahaoa, Isolni gimin manderangni agananirang pilakan bebe ong·a ine anga nika. Indiba, Isol an·ching baksa maikai agangrika? Isol baksa agangrikani gimin Isolni ripengrang indake aganronga: “A·gilsako donggipa an·tangni dedrangna Isol bang·a dingtang dingtang cholrangchi agana.” Indiba ja·mano, Jisu Kristochi talbate ua mande·rangna aganaha. Bilsu gitam skiprakani aro aganprakani ja·mano Jihudi mande·rang uko chisolo datkape so·otaha. Indake Isolni ku·rangko an·ching da·o Jisuni ja·mano knana man·jaha.

Jisu Kristoni ja·mano Isol Gisik Rong·talgipako gital bimango watatskaaha. Ian Mondoli ong·a. Ia Mondoliko Kristoni Be·en ine minga. Mondoliko Kristoni be·en ine mingani a·sela, iachi Isolni ka·saaniko manderangna uiatna gital chol ong·aha.

Ma·gipani ku·rangko knae ma·gipani jakrangchi de·tome ma·gipani ka·saaniko bi·sani uia gita, Kristoni be·enni bak ong·gipa manderang Isolni ka·saako uia aro Isol an·chingna uamangchi agana. Mon-

dolio dongjaode, Isolni ku·rangko rong-tale uina man·ja. Indiba Isolni katako skiprakaniko an·ching gisik nange knatimode aro gisik pil·e Gitelni Meatamko cha·ode indide, Isolni agana katako aro uni ku·rangko an·ching knana man·a. Aro bon·kame biranichi an·ching Isol baksa agangrikna man·a, aro Gisik Rongtalgipa, an·ching Isolni dedrang ong·a ine saki on·dapa.

## ISOL MAI GITA DAKA

Darangba Isolko changsaba nikkuja. Isol gisik ong·a. Isol gisik ong·ani gimin Isolko rongtale uina man·jawa. Indiba. Isol mai gita daka uko maiba toanichi an·ching aganna man·gen. Pagipa bi-sarangna maikai ka·sae daka, Isol an·chingnaba indaken daka. An·ching namgipa pagipa aro namgijagipa pagiparangni dingtanggrikaniko chanchiode, Isol mai gita daka uko uina dakchakani ong·gen. Namgipa pagipa namgijagipa pagipaoni mai mairango di gtanga ?

### **Namgijagipa pagipa :**

Namgijagipa pagipani kamrangni gimin niode uni ia kamrangko nikgen.

Ua an·tangni jik dedrangko cha·a gri, ringa gri dongata. Ua arata aro kam ka·e on·tisa man·paakoba nokgimikni cha·anina koros ka·ani pal an·tangni giminsan chanchie ong·gijana koros ka·e bon·ata.

Ua dedrangko kusi ong·atna gita, uamangna pangnaba golporangko agane on·ja, aro uamang baksa kal·grikrongja. Uamangni sing·anirangkoba ua knachak·gija dongaia.

Namgijagipa pagipa dedrangni gimin pangnaba chanchija. Dedrangni namgijako dakoba ua uamangko sasti on·ja. Bi·sarangni namnika gita ua uamangko dakna on·aia, maina ua uamangko namatna neng·na sikja. Ua an·tangde nama namgijako uia indiba dedrangko namatna sigkijanio ua dedrangni namgijako dakoba nie dongaia.

An·tangni dedrangko schoolchi watnaba ua simsakja aro an·tangni dedrangko noko aro a·barango kam ka·ataia. Schoolchi watani namgniko ua uiachim indiba dedrangni namgnina chanchina sikjani gimin ua dedrangko schoolchi watja. Ua an·tang dedrangna ka·saja aro uamangko ka·sanningija dake nokol chakolrang gita

jakkala. Indiba, namgipa pagipa iarang pilakonin pangpilskaa.

### **Namgipa Pagipa :**

Namgipa pagipa jik dedrangna simsaka. Ua m·drangna cha·aniko, gana·chinanirangko chu·onga gitan bree on·na man·a aro uamangni gimin niroke pang·nan simsaka.

Ua dedrangko ku·si ong·dilna ske pang·nan somoi gita dedrangna golporangko aganronga, aro uamang baksa kal·grik·ronga. Uamangni sing·anirangko ua kna·tima aro uamangni sing·anirangna agan·chakronga. An·tangan nama aro namgi·jani gimin rongtale, bi·sarang namgijako dakode an·tangna aro gipinrangna dukko ra·baronga ine uie, uamangko sasti on·ronga. Indake bi·sarangni namgijana uamangko sasti on·on, basakoba uni kam·rangko namja gita an·ching chanchimana. Indiba, ian uamangko namao re·atna aro nama janggi tanganio tangatna skani giminsa ong·achim.

Bi·sarangko schoolchi watjaode uamang name janggi tangna man·jawa ine uie ua uamangko schoolchi watna simsaka. Indake an·tangan cha·a ringa gri gita ong·-



piloba ua dedrangni leka porana simsaka aro uamangko chugipa classrangona poraita. Dedrang dal'a chu sokahaon kraa gita ua uamangko jakgitel wata, aro uamangna indake ku patironga, "Songjinmarangona re'ange an'tangna janggi tangani cholko sandibo; an'tangna a'barangko dakbo, aro an'tangni mikkang janggi tangao choljokna man'na gita cholko man'mitingon tarie ra'bo."

Namgipa pagipa indake dedrangna kasae uamangko kusi ong dilasan ong'aja, indiba, uamangni mikkang janggi tangana uamangna cholrangko mesoke on'a.

### **Isol Namgipa Pagipa gita ong'a :**

Ia namgipa pagipa gita Isol ong'a ine an'ching chanchiatode, Kristianrangni Isola maidakgipa ong'a aditako uina man'gen. Ua namgijagipa pagipa gita ong'aja namgipa pagipa gita ong'a ine an'ching uni ia kamrangko nika.

Ua an'chingni be'enni nanganirangna simsake an'chingna cha'anirangko patia. Ua an'chingni ganani chinanirangko an'chingna on'a. Ua an'chingna mikkako waata, salko rakata, aro a'ako a'sal gnange ong'ata. An'chingni duknisalo, jajreng-

ani salo ua an·chingko ka·dimeata.  
 An·chingni gito ring·a gita,  
     Jajrengarang duulon angko,  
     Re·on anga bu·sugrimko,  
     Nabaa Gitel, ang gisiko,  
     Na·an angna simsaka.

Aroba Isol an·chingni be·enni cha·  
 anirangkosan on·aia ong·ja, indiba ua,  
 an·ching gisikni bidingo dal·rorona man·na  
 gita an·chingna gisikni cha·anikoba patia.  
 Indake Isolni an·chingni nanganirangko  
 patianini gimin Isolni sepango janggi  
 tanggipa sakantian bang·beako saki  
 on·na min·gen. Basakoba basakoba ua  
 ka·sagipa pagipa gita ong·e, an·chingni  
 namgnina an·ching gualanirangko dakon  
 an·chingko sasti on·ronga. Iani gimin  
 Israelrangni janggi tangani gimin Sastroo  
 segiminko an·ching poraiode rongtale uigen.  
 Isolni katako Israel manderang manija·  
 haon, Isolni sasti uamangona re·baronga.  
 Indiba Israel manderangko Isol sasti on·on  
 uamangko gisik pil·atna aro uamangko  
 namako dakatna miksonganiosa sasti on·  
 aha. Indake dal·rororo an·ching Isolni skako  
 dakjaon, ua an·chingkoba sasti on·ronga  
 aro ian an·chingko uni skako uiatna ong·a.

Namgipa pagipani an·tangni dedrangko  
 a·gilsakni biding uianirangko skie ra·china

namgipa schoolrango poraiata gita, Isol an·chingkoba gisikni biding dal·roroanina a·gilsakni ma·manti duk sukni schoolrango poraiata. Indake mande a·gilsako donge janggi tangmitingo bang·a duk sukrangko chakna nanga. Indiba ia duk aro sukrang, an·chingni janggi tanganio Isolni miksonganirangko rongtalbate uichinasa ong·a. Isol pil·e an·chingko jakgitel wata. Pagipa an·tangni depanteko sikari ong·atna skode, una slaiko ba chriko on·e uko skina nanggen. Iarang namen kenbegnigiparang ong·a, indiba, uarangko pangnan jakkalna on·gija pakmao chan·chane ba sikec donaiode depante mamungdakeba namgipa sikari ong·jawachim. Gisik gnanggipa pagipa an·tangni depantena silchidarerangko jakkalchina gita skie sikar ka·na on·a. Burungo kenbegnigipa matburungrang donga ine pagipa uia aro haida basakoba a·sel sokap ong·e chikako man·naba donga ineba pagipa uia. Indiba sikar ka·rongjaode depante maikai namgipa sikari ong·gen? Jakgitel ong·ania kenbegnigipa silchidare gita ong·a. Indiba ia kenbegnigipa silchidareko name rim·na aro jakkalna tarijaode, mande Isolni miksonganiko chu·sokatna man·jawachim.

Nama mesokaniko on·na gita, Jisu mande saksani depante sakgnini gimin

toaniko aganaha. Chonbatgipa depante pagipani una on·a piak tangkako ra·e jakgitele janggi tangna che·a songchi re·angaha. Ua an·tangni tangkako simsak·gija koros ka·e bon·ataha, an·tangni jakgitelanikoba namgni gri ong·ataha. An·tangni gualako ua nikpile kratcha·e pagipaona re·pilangaha. Indiba, uni re·bapilon pagipa una indake agansojaha, “Na·a goka bi·sa; na·a rusigipa ong·a; angni nokoni bakbak katangbo.” Indiba indake agansoani pal, an·tangni depantena ka·saani gimin ua kusi ong·bee an·tangni depanteko kema ka·aha aro uni re·bapilon da·a alaniko dakaha.

Unigimin saoba an·chingko Isol mai gita daka ine sing·ode, an·ching indake aganchakna man·gen, “Ua ka·sagipa pagipa gita ong·a.”

## ISOL MAIKO DAKAHA

Isol a·gilsakko name dakaha. A·bachengani ki·taponiko an·ching niate niode iako nika. Isol a·gilsak aro uno donga pilakkon name ong·ataha. A·gilsako aro salgisako, sal aro wal, a·a aro sagal, a·ani kosako pilak sam bolrangko, sagalni ning·o donggipa pilak janggi gnanggiparangko sako bilgipa pilak do·o matrangko ong·-

atani ja·mano Isol an·tangni ong·atgimin-rangko nie nioa, ñame nikaha. (A·ba. 1:1-32.) Indake an·tangni nitoe ong·atgimin a·gilsako mandeko an·tangni jagring gita ong·ate donaha aro mandena uarangko on·aha. Mandeko ong·ate an·tangni nitoe dakgimin a·gilsako donani miksongania, jedakode mande an·tangko jakgitele ola-kina man·gen indake ong·achim. Aroba Isolni ong·atgimin manderang jedakode saksa sakgipin baksa nangrime melic janggi tangna man·gen indaka miksonganiosa Isol mandeko an·tangni ong·atgimin a·gilsako donaha. Indiba pap ia a·gilsakona napbae Isolni name miksonganiko gim·ataha. Antan gni ong·atgiminko Satan nosto ka-enga ine Isol nikon ua maiko dakaha? **Ua** Israel ma·chong chi·gniko seokaha jedakode uamang uni manderang ong·gen aro ua uamangni Isol ong·gen indaka miksonganio uamangko seaha.

### **Isol Israel ma·chong chi·gniko seaha :**

Israel ma·chong chi·gniko Isolni ding-tangmancha sena nangani a·selko an·ching sandiate niode, Israel ma·chong chi·gni gipin jatrangna bate nambatani gimin, ba uamang bang·batani gimin Isol uamangko seaha ia ong·ja ine an·ching nika. “Nang-ni Isol Jehova, an·tangni manderang ong-

china, a·ani mikkango donggipa pilak manderangoniko nang·ko seaha. Na·simang pilak mandena bate bang·batani gimin Jehova na·simangko.....seaha indake ong·ja; maina na·simang pilak manderangna bate bang·batgijagipachim; indiba, Jehova na·simangna ka·saani gimin.....na·simangko piokaha.” Indide, Isol Israel manderangko uamangna ka·saahani giminsa uamangko seaha, indiba, an·ching iano indake gisik ra·na nanga, chong·motan, Isol Israel manderangko uamangna ka·sateahani gimin seaha ine chanchina nang·ja, maina Isol darang jatnaba ka·sateja. Indiba Isol Israel manderangko seahaon, miksongani gnangsa uamangko ua seaha. Ia miksongania, jedakode ia segimin manderangchi a·gimikni manderang Isolko uic uamangchi janggi jokaniko man·gen ian ong·achim. Indide Isol Israel manderangko seon, uamangchi a·gilsakna janggi joka nikoon·asa ua uamangko seaha.

### **Isol Uamangko Egypt A·songoniko rimongkatbaaha :**

Isolni seokako man·gipa manderang Egypt a·songo nokol itako man·e dukko man·engachim. Uni segimin manderang indake duko ga·akenga ine Isol nikon Mose Pharaoni mikkango bang·a aiao

inmananirangko dake, Pharaoni gisikko nom-ate Israel manderangko Egypto nokol itaoniko rimongkatbaaha. Uamangko rimongkatako nike manderang Isolni bilni gimin aiao inmanaha, aro bilsiantin ia rimongkataniko, Isolni dal-gipa kam ine gisik ra-na Watchangani Alaniko manirongaha. Iako uamang bilsiantin mania-achim. Indake iako manianichi uamang-ni dedrang surdrangko Isolni aiao inman-gipa kamni gimin pilak chasongrangenan gisik ratjringna manaha.

### **Isol Uamangna Niamko onaha :**

Egypt a songo nokol itaoniko rimongkatbaani jamano, uamang Isol baksa aro mandeskarang baksa markai janggi tangrimna man-gen indake Isol uamangna niamko onaha. Ia niaman, Ge-eta Mingchikung ong-achim. Ia Ge-eta Mingchikungko Isol Sinai a-brio Mosechi onaha. Ia ge-eta mingchikungon skanggipao Isol antangni manderangna aganaha, "Angan na-simangni Isol." Darang gipin jatrangna Isol indake agana dongjaha. Ia aganani-chin, Isol Israel manderangko gipin jatrangoniko dingtangataha ine an-ching uia. Indake gipin jatrangoniko dingtangataniko man-e, Israel manderang Isolna kakket ong-na aro uni on-gimin niamrangko

manina ga·akachim. Indiba, Israel mande-rang Isolna kakket ong·jaha aro Isolni ong·gimin niamrangko manijaha.

Ge·eta Mingchikungko man·ani ja·mano uamang maiko dakaha? Egypt a·songo nokol itaoniko Isol uamangko jokataha ine uamang uiahaoba, aro uamang Isolni dingtangmancha seokako man·gipa jat ong·a ine uiomangba indiba uamang Isolni ge·etanirangko manijaha. Isolni Ge·eta Mingchikungko Moseni ra·na re·angengmitingon, Aaron Matchu bi·sani bimangko dake manidilsoaha. Indake dakachi an·tangtangko seokgipa Isolko uamang jegalaha aro uko chonnikaha. Ian uamangna dal·bea pap ong·achin.

### **Isol an·tangni katchinikgiparangko watat aha.**

Isol an·tangni ge·etanirangko maniatna aro uamangna ku·rachakanirangko gisik ra·jringatna gita an·tangni katchinikgiparangko watatjringaha. Uamangni wat·galgimin Isolona re·bapilchina, Isaia, Jeremia, Amos aro gipin katchinikgiparang an·tangtangni somoirango manderangko mik·rakataha Jeremia katchinikgipani ia kata-rangko an·ching gisik ra·a: "Angni man·derang minggni namgijarangko dakaha. Uamang angko, jeon, janggini chimik



ong'a uko watgalaha. Indake chi gri-gipa chiakolrangko an·tangtangna cho·aha." Isaia katchinikgipani ia katarangkoba chanchibo: "Anga dedrangko aldua aro dal·ataha, aro uamang angko bobil dake bamjaha. Matchu an·tangni nokgipako, aro gada an·tangni nokgipani alchakaniko uia; indiba, Israel uija; angni manderang chanchie nija."

Indake manderang Isolni katarangna knachakgija skatang janggi tangaha aro indake janggi tanganichi an·tangtangna bang·bea dukrangko ra·baaha. An·tangni segimin manderangko sasti on·na gita Isol Assyriarangko aro Babylonrangko watataha. Hajalni hajal manderangko rim·ange nokol itaha.

### **Isolni Dal.batsranggipa Kam :**

Seokako man·gipa jat on·gimin Niamko rakijaha. Uamangona watata katchinikgiparangni katako uamang ra·chakjaha. Uamangni ia namgijarangna Isol uamangko sasti on·aha, indiba Isol uamangko watgaljaha. Ua uamangna ka·sakuaha aro indaken bon·kamao Isol an·tangni saksa kamkam Depanteko a·gilsakona watataha. Ian Isolni dal·batsranggipa kam ong·achim aro ia Isolni dal·batsranggipa kamni gimin ia ki·tapni bon·kamgipa bako an·ching poraigen.

## ODAI. II.

# MANDE

### MANDEA MATBURUNGMA ?

#### **Mande aro Matburung.**

Isolni gimin minggitam sing·anirangko an·ching aganchakna joton ka·aha. Ia minggitam sing·aniranga, Mande a Isolko uina man·ama ? Isol mai gita daka ? aro bon·kame, Isol maiko dakaha ? Da·o an·chingni minggipin sing·ania, Mande a maia ? Ia sing·aniko ramram gita chan·chiatode, sing·bagimin minggitam sing·anirangna bate aganchakna altuabatgen gita nika. Mandeko an·ching mikronchinika, aro mandeni gimin chonchongipa bi·sarang mangba bang·en aganna man·gen.

Mandeo be·en bimang, an·chi, aro grengrang donga. Mandeo sko, mikron gingting, ku·sik, aro nachil donga. Mandeo ja·a samgni, jak samgni aro uandaken mandeni gipin bakrang donga. Ua ringna chiko, rang·sitna balwako aro janggi tangna gita cha·anirangko nanga. Mande sakantian me·chikoni atchia; ua bi·sa ong·e,

bilsok jaksokaona dal·roroa aro budepae sia. Mandeni gimin jerangkon an·ching aganbaaha, apsankon achakni gimin, mat·chuni gimin, makkreni gimin aganna man·genchim. Be·enni biding gita chanchiode mande matburung ong'a. Uni gimin Sastroo indake agana,

*"Mandea matburungrang gita ong'e gimagipa ong'a."*

*Aroba sastroo indabe agantaia,*

*"Mandeko a·dimuoniko ra'e dakaha."*

Ian kakket ong'a, ine an·ching uia. An·chingni be·enko bilakatna an·chingni cha·anirang pilakan a·aoni ong'a. A·ao ge·e an·chingni cha·aniko man·giparang, me·raku, ka·rek, badam, ta·a, aro ugita bang·bea gipin bosturang ong'a. Dut, do·chi aro ugita, gipin cha·anirang jerangkon an·ching a·aoniko man·ja gita nika, iarangkoba kakketko aganode a·aonin ong'a. Mandeko a·dimuoniko dakahani gimin mandeni be·en a·dimu ong'e siani ja·mano a·dimu pil·taina nanga.

Indide be·en gita chanchiode, mande matburung ong'a. Mande aro matburung apsan.

Mandeo taning donga.	Mongmaoba taning donga.
Mandeo nachil sam- gni donga.	Gadaoba nachil samgni donga.
Mandeo gingting donga.	Achakoba gingting donga.
Mandeo mikron ronggni donga.	Do'oba mikron ronggni donga.

Be'enni skanirangko chanchie nioba,  
be'enni skani bidingoba mande aro mat-  
burung apsan ong'a.

Mande okkrio cha- aniko am'a.	Matchapengba ok- krio cha'aniko am'a.
Chi ringna sko man- de chiko am'a.	Matmaba chi ringna sko chiko am'a.
Mande singhoko ni- ko kene kata.	Balgitchkba apsan.
Mande an'tangna jo- rako ra'a.	Do'orangoba jora donga.

### **Indiba mande matburungna bata.**

A'gilsako donggipa pilak matburung-  
rangna bate mande chanchina changbata,  
aro pilakna bate gisik gnanibatgipa ong'a.  
Beben mitamrang mandeko an'tangni gisik-  
ko changbate jakkalna man'gipa matbu-  
rungsan ong'a ine chanchia. Makkreba  
an'tangni gisikko jakkalna changani gimin  
mitamrang mande makkre ong'a ine agana.

Indiba mande makkre ong·ja. Indake mitam kamrango mande matburung gita, kam aro bewalrang apsan ong·angoba indiba bang·aon mandeni kam aro bewalrang matburungrangoni dingtang ong·ani gimin mandeko matburung ine aganna man·ja.

### **Mande matburungoni dingtanga.**

Mitam matburungrang aiao inmangipa kamrangko ka·na man·a. Mesokna gita mitam do·orang Africa a·songoni Europe a·songona rama branggija bilrurana man·a. Uarango rama sandie bilna gita meprang aro salgro salgipengko mesokani kolba dongja. Indiba uarango uitelani gisik donga, aro indakgipa uitelani gisik dongani gimin uarang rama branggija bilrurana man·a. Uarang ua gita, ba ia gita bilna nanga, ong·jaode rama branggen ine chanchiani gisik dongja. Indiba uarango uitelani gisiksan dongaia. Mandeosan bikpil pangwil chanchina changani gisik dongaia.

Salsao jiksese burungko re·angmitingo pe·daldalgipa makkre bi·sa mangsako nik·aha. Ia makkre bi·sako ra·bae uamang mande bi·sako gita aldumitangaha. Una

botolo dutko on·rongaha, aro mande bi·sana gitan simsake uko auatrongaha. Mandeni cha·aniko on·e salantio un baksa agangrike niaha. Mande bi·sako gita al·due, agangrikrongode makkre bi·sa mande bi·sa gitan dakgen ine uamang chanchiaha, indiba, ian uamangoni gualani ong·achim. Matburungo uiani gisiksan dongaia, indiba, uamangor bikpil pangwil chanchiani gisik dongja. Indakgipa bikpil pangwil chanchiani gisik mandeosan dongaia.

Mande okkrianasan cha·aija; chi ringna skanasan ua chi ringaija, aro ka·onango ka·onanganasan dokaija. Indiba okkrio cha·na nanga ine mande uia; chi ringna sko chi ringna nanga ine mande uia; ka·onango dokna nangode dokna nanga ine mande uia. Unigimin chanchigija an·ching maiko dakgenchim, chanchie an·ching uarango jegalpilna man·a. Indiba matburungrang an·ching gita indake chanchie kam ka·na man·ja. Matburungrang singhoko niko kene katnaba donga indiba, singhoko niko katna nanga ine uamang uija. Mande singhoko niko kene katnaba donga, indiba cholko niesa ua katgenchim.

## MANDEA BE'EN BIMANGSANMA BA MANDEO JANGGI DONGAMA ?

### **Mandeo Janggi Donga.**

Mandeo janggi dongjagenchimode, mandeni be'en bimang mamungnaba gamchatani dongjawachim. Uan janggi gri-gipa aro choligijagipa bostusan ong'aigenchim. Beben mandeni janggi be'en bimang dongjagenchimode a'gilsako dongna man'jawachim, aro mandeskarang baksa agangrikna gita man'jawachim. Indide mandeni be'en bimangjanggi gri mamungba gamchatja, aro mandeni janggi mandeni be'en bimang gri mamungba ong'ja.

Iako rongtalatna gita an'ching mesokani mingsako chanchina. Siliting sringa gri agangrikna man'gipa kolko an'ching nide, uni ning'ode bang'a silitingrang aro aiao inmangipa bosturangan gapaia ine nikgen. Indiba electricni wa'al dongjaode uarang mamung gamchata dongja. Ia sringgimin silitingrangko batteryo nangdikatena nanga, unosa ua electricni wa'alko man'e kam ka'a, ong'jaode uarang mamungba gamchata dongja. Uan ramram silitingrangko danchime gala gitasan ong'aigenchim. Indiba battery gital ong'genchimoba, bak-

soo chipe noksikchi gale donaiode uaba mamung gamchata dongja. Silitingrang donggija battery gitalba an·tangeride cholija. Silitingrangko sringbae batteryo nangdik-ateosa jakkaltogipa ong·a. Uandaken Isolnimandeni be·en baksa janggiko nangrimatosa mande janggi gnanggipa ong·a (A·ba.2:7) “Isol a·ani a·dimuko ra·e mandeko dakaha, aro uni gingkolo baljanggiko spoataha, unon mande janggi gnanggipa ong·aha.”

### **Mandeko Isolni Jagring gita Ong·ataha .**

Mandeko Isolni jagring gita ong·atani ortoko an·ching uina neng·a. Indiba, mandeko Isolni jagring gita ong·atani ortoko indake aganode an·chingna uina altuani ong·gen gita nika. Ramram gita jagringni gimin an·ching chanchion, jeni jagringba maini jagring ong·a uko mesoka ine nika. Indake mandeni jagring mande gita daka, achakni jagring achak gita daka aro uandaken. Mandekosan Isolni jagring gita ong·ataha. Achakko, menggoko, bolko, ba rong·teko Isolni jagring gita ong·ataha ine an·chingna aganja. Indake ong·genchimode, mandekosan Isolni jagring gita ong·atako man·e mandeosan Isolni gunko nikna man·a. Pilak gipingrangoni dingtangmancha man-



deo nikaigipa Isolni guna maia? Nama namgijako uiani gisikan ong'a. Mandena agre pilak gipinrang nama namgijako uiani gisik dongja. Indake ong'ani gimin mandesan pap ka'na man'a. Menggo noko dona na·kamko cha·unaba donga, indiba, menggo pap ka'aha, ua gisik pil'na nangginok ine an·ching aganja. Menggoko cha·uana an·ching doknaba donga, indiba, mikangchi gisik raktaichina ine una skianiko on·na an·ching menggoko dokja. Indide mandesan Isolni jagring gita ong'atako man'e nama namgijako uiaia, aro mandeosan pap dongaia.

Aroba mandeko Isolni jagring gita ong'atahani gimin, mande an·tangko Ong'atgipako sandina changbaani gisik donga. Mandena agre pilak gipin Isolni ong'atgiminrang Isolko am·pilani gisik dongja. Indide, mandeko Isolni jagring gita ong'atani ortoko indake chanchina man'a.

Indiba ia Isolni jagring gita ong'atgimin mandeko pap ong'siataha. Papchi ong'siatako man'e mandeo Isolni jagringko rongtale nikna man·jaha. Iani bidingo Dr. D.T. Niles indakgipa mesokaniko an·chingna on·aha. Sikdikgipa walo, salgio aram dongjao an·ching jajongko pokrini chio

rongtale nikna man'a. Indiba aram sim-dapode, aro balwa bale chi pokpekode chio jajongko rongtale nikna man'ja. Mandeko Isolni jagring gita ong'ataniba apsan. Mandeo pap bang'ode, Isolni jagringko mandeo nikna man'ja. Indiba, mande Isolni skako dakjringode aro uni ramao re-rurarongode indide mandeo Isolni jagringko an'ching rongtale nikna man'a. Mande aro Isolni gisepo papni aram sim-dapon, mande Isolni jagring gita ong'atoko man'ahaoba, Isolni jagringko mandeo nikna man'ja.

## SAKGIPINRANG BAKSA NANGRIMANI

Mandeni gimin chanchiode sakprakan saksa sakgipin baksa nangrimani donga ine nikgen. Ia nangrimaniko an'ching an'chingni dukni ba kusini salrango ma-si-rongbata. Indake songsulni manderangni duk ong'ani salo anga duk ong'paa aro uamang'ni kusi ong'ani salo angaba kusi ong'paa.

Iani miksonganiko talatna an'ching me'raku kopsani gimin chanchina. Me'raku kopsao bang'a birongrang donga.

Birong rongprakan bongsa ronggipinoni dingtanga, indiba, rongprakan bitop topsoni ong'a. Birong rongprakan bitoponi bitchiko salope dal'roroa, aro me·raku topsara bipangoniko chiko salopskaa aro bipangara a·aoniko chi aro a·salko salope dal'roroa. A·a ka·sinode aro a·sal gnangode me·raku sila aro bitopba dal'a aro be·enba daka. Indiba, a·a ran·ode aro a·sal dongjaode me·raku silja, bipangba dal'ja aro biteba dal'ja aro be·enba dakja. Me·raku bipang bitchri rongsaoni chaa. Me·raku bitchrini kri uni bipang aro birongrangba ong'a. Me·raku bipang birong rongsaoni chae dal'roroani gimin ua birong janggignanggipa ong'a. Je birongoni me·raku bipang chabaaha, ua birongba una skanggipa birongoni chagimin bipangoni ong'a. Indake me·raku birong rongsa ronggipinna janggiko on·rikrikbaa gita ong'a.

Mandeni giminba apsanke aganna man·gen. Mande sakprakan me·raku rongprak gita ong'a. Me·raku birongrang kopsano donga gita, mande sakantiba mandeni jato nangrimani donga. Uni gimin mande sakantini janggi tangani uni pagitchamrangni janggi tanganio bak man·paani donga. An·ching indake pagitchamrangni janggi tanganio bak man·pagiparang

ong·ani gimin, Adam aro Hobani de  
 sudrang ong·e, Adam aro Hobani nama  
 aro namgija kamrango bak man·pagipa-  
 rang ong·a.

Mandeni ong·bewalan mande saksa  
 sakgipin baksa nangrimani donga. Mande  
 saksa sikar ka·e matchokko man·ode sak-  
 gipinrangna suale cha·para; noksao bi·sa  
 saksa siode noksul songsulni manderang,  
 sigipani ma·a paa aro ma·drang baksa duk  
 ong·paa. Indide mande saksan janggi  
 tangna man·ja. Ua saksan janggi tangode  
 mande ong·jawachim, indiba matburung  
 ong·genchim. Indide, mande ma·drang  
 baksa, songtangni manderang baksa, jat-  
 skani manderang baksa, a·songskani man-  
 derang baksa, ong·ja, a·gilsak gimikni man-  
 derang baksan bak man·paani donga aro  
 indake bak man·pae janggi tanga.

## ODAI. III

# PAP.

### PAP A.GILSAKONA MAIKAI NAPAHA ?

A·gilsako pap donga ine sakantian uia. Manderangni papni kamko nikna an·ching ruute sengna nangja. Uamangni saksa sagipin baksa jegrikaniko, saksa sakgipin baksa dakgrikaniko, saksa sakgipinko mit-chigrikaniko, an·ching pangnan nika. Mande namgijako dakna ja·ku de·gijaan dongna man·ja. Beben an·ching saksa sakgipinna ka·sana nanga, saksa sakgipinna simsakna nanga, saksa sakgipinko dakchakgrikna nanga aro saksa sakgipinni gimin namako agana nanga ine uia. Indiba, an·ching iarangko dakna nanga ine uioba, iarangko dakja: batesa, an·ching saksa sakgipinko mikbua, saksa sakgipinko mitchia, aro saksa sakgipinko chonnika aro saksa sakgipinna ka·saja. Ian an·chingni ka·tongo donggipa papni a·sel ong·a.

Indakgipa pap maikai a·gilsakona aro an·chingni ka·tongrangona napaha ? Ia

sing·ani an·chingna jajaani ong·a, maina Isol a·gilsakko name dakaha, aro uko daka matchotoa nama ine nikaha. Dingtang dingtang a·songrango, bang·a manderang, an·tangtangni somoirango an·tangtangni uiatangtang gita pap maikai a·gilsakona napaha iani gimin talatna joton ka·aha. Indiba ian maikai ong·chongmotaha iani gimin darangba an·chingna rongtale aganna man·jaha. Ian maikai ong·chongmotaha iani gimin an·ching uina skode, an·ching, Sastrooniko poraina nanggen. Iani gimin A·bachenga Odai 3 girao Adam aro Hobani pap ka·ani bidingo seaoniko nikgen. Indide, pap a·gilsakona maikai napaha aro maikai giprorocha, iani gimin uina skode, an·ching Adam aro Hobani gimin poraina nanggen. Indiba iako poraion, an·ching scienceko poraia gita, Historyko poraia gita, ba Geographyko poraia gita poraina nangja, maina, ian Science, ba Geography, ba History kitap ong·ja. Ia kitap Isolni an·tangko mandena parape·aniko serik·gipa kitapsa ong·ani gimin, Isolni kamni gimin aro Isolni ong·atgimin mandeko pap maikai ong·siataha iani giminsa poraigen.

### **Eden Bari**

Ia nitobegipa bariko a·gilsakoniko an·ching da·o am·e niode nikjawaha. A·-

gilsakni maponiko, Eden bari bano dong-achim, an'ching am'e niode da'o nikna man'jawaha. Maina Isolni ong'atchenggipa a'gilsakan Eden bari ong'achim. Isol ia bariko nambee ong'ataha, aro mandeni janggi tanganio nanga pilakkon uno donaha, jedakode mande uarangchi kusi ong'na man'gen.

### **Nama aro namgijako basee ra'ani.**

Isolni ong'atchenggipa mande nama aro namgijako uijachim. Uamangko Isolni jagring gita rongtalbee ong'ataha. Isol an'tangni ong'atgimin mandeko namako dakchina Isol uamangko drajaha. Draachisa namako dakataiode, indide uni namako dakani namgni dongja. Chanchi-chipe na'a saksa bisako una adita paisarangko on'e una indake aganode, "Ia paisarangko ra'bo aro na'a ia paisarangko nang'ni ripengskana suale on'na nanga, ong'jaode anga nang'ko sasti on'gen." Indake aganatani gimin ua 'bi'sa an'tangna on'ata paisarangko an'tangni ripeng-skarangna suale on'naba donga, indiba indake suale on'genchimoba uni ripeng-skarangna ka'sachongmote suale on'ade ong'jawachim. Uandake mande namako dakna skode ua namako dakna cholko

ra·na man·na nanga ong·jaode ua saniba ge·etasan namako dakaiode uni namako dakani nama kam chongmot ine aganna man·jawachim.

Iani giminsa Isol barini jatchio nama aro namgijako uiani bolko ge·aha. Ua Adam aro Hobana aganaha. “Na·simang ia bolni bitena agre bario donggipa pilak bolni biterangko cha·na man·a.” Isolni ge·etaniko uni ong·atgimin manderang manigenma manijawa, iako nina gita Isol uamangko beng·aha, aro manijaode ua-uamangni sasti donggenchim. Uamangni ia manigijana sasti sia ong·achim. Mande namao janggi tangna skode, salgio donggipa Isolni skako dake aro una bame janggi tangna nanga.

### **Dakmajogipa**

Indiba mai ong·jok ? Skangde, Adam aro Hoba, pagipa Isolni katarango ka·donge aro uarango kusi ong·e janggi tangengachim. Uamang nama namgijako uiani bolko niatmangjahachim. Indiba, salsao indake ong·aha, Isolni ong·atgimin jonturangoni ma·sa bariona re·bae Hobana aganaha, “Isol na·simangko ia bolni biteko cha·na beng·ahama ? Isol na·simangko ia bolni biteko cha·na beng·aha, maina ua



bolni biteko cha·ode, na·simang Isol ong·gen ine ua uia. Uni giminsa Isol na·simangko sichong·motgen ine kenate beng·aha. Indiba, na·simang sichongmotjawa, maina Isol togiengasa.”

Unon Hoba ua bolni biteko name niaha aro nitaitaiaha, aro cha·na namsusu dake nike mikbokaha. Ua ua bolni biteko ake cha·aha aro antangni segiparaba on·oa uaba cha·aha.

Ian mandeni skanggipa pap ong·a. Uamang Isolni beng·ako manijahani gimin Isol Adam aro Hobako Eden barioniko a·rikataha. Poraibagimin tak dokgipao an·ching me·raku bitchiloni me·raku ong·katrikribza ine nikbaaha. Indake ong·ani gimin mande sakantian Adam aro Hobani niam pe·anio tak man·pagiparang ong·aha. Indake an·ching sakantian bak man·pagiparang ong·hani gimin dakmajogipani katako Isolni katana tate knatimna sikbatgiparang ong·aha.

Indide Adam aro Hobani golpo an·ching sakantini golpo ong·a. Atchimitingo an·ching mamungkoba uigija atchiaha. Indiba ka·sne ka·sne sakantian namana bate namgijako dakna skani gisik batro-

robaa. Indake an·ching bonkamao namgi-  
jako dake barioniko rikgalatako man-gi-  
parang ong·aha.

### **Pap mandeni ka·tongo a·bachenga.**

Pap pangnan mandeni ka·tongo a·ba-  
chenga. Jisuni indake agananiko an·ching  
gisik ra·a, namgi·a mande an·tangni ka·  
tongo nama chanchianiko paraka,  
indiba namgi·a mande an·tangni ka·  
tongo namgi·a chanchianiko paraka.  
Aroba indake agananikoba an·ching gisik  
ra·a, mandeni ka·tong namgi·a chanchi-  
anirang, tilekarang, cha·uarang, mande  
so·otarang, mikbokarang, namgi·a toi-  
napa, miknenga, ka·stapa, gaora de·a,  
sel·gi·a kamrang ong·kate mandeko marang  
nang·ata. Indide, mandeni pap mandeni  
gisiko chanchianirangko an·chingni kamchi  
parakatanisan ong·a. Mandeni gisiko  
chanchianirangko nikgi·a kamrangchi  
parakatanisan ong·ani gimin manderangni  
nikao pap ong·na skang, ua gisiko pap  
ka·chengaha.

### **PAPNI BITE**

Mande an·tangni papchi Isoloniko ding-  
tangataniko man·aha. Ua Isoloniko ding-  
tangatanikoson man·aiaha ong·ja, indiba

pap ka'e Isoloni che'e janggitanganichii a mingbri kamrangko an'ching nika.

**Skanggipao mande an'tang baksa dakgrikna nangaha.**

Hobani on'gimin biteko cha'ahaon ua an'tangni bimangtangna kratcha'aha aro an'tangni dakgimin kamnaba kratcha'aha. Isolni beng'ako manie dongenga dipet, Adam tom'tome kusi ong'e janggi tangna man'ahachim. Indiba ua Isolni beng'ako manigija dakahaoa tom'tomaniko aro kusi ong'aniko gima'ataha. Uni gisiko kenanin gapaha, aro uni gisiko dingtang dingtang chanchianirang nabaaha aro uni gisiko namgijana skanirang batroroaha. Indiba ua maiko dakaha? Ua indine aganjaha, "Anga goka gita kam ka'aha. Anga Isolni beng'ako manijana jara ong'beaha. Ian angni dos ong'a." Indiba ua indakesa aganaha, "Angni dos ong'ja, Hobasa angko tol'napaha." Ua an'tangni dakgimin kamna daiko ra'gija sakgipinkosa matnange aganskaaha. Hobaba ap-sanko aganpaaha. Ua an'tangni gualako ku'rachakani pal chipukosa matnange aganskaaha. Chipu angko tol'napaha inesa Hobaba aganaha. Indake Adam aro Hobani intalan da'alona kingking mandarang an'tangtangni namgija kamna

daiko ra'na sikja aro man'a dipetde pa'ske  
jokna joton ka'ronga.

Schoolo poraigipa bi'sarang mangmang-  
ba an'tangtang aratachi aro simsægijani-  
chi porikarango chu'sokgijagipa ong'oba  
indakesa aganronga: "Ian angni dos ong-  
ja. Angni simsægija aro man'gijani gimin  
ong'ja, indiba, master chingna name ski-  
jahani giminsa ong'a." Tilekao rim'a man-  
gipa manderang indakesa aganronga,  
"Ian angni a'selde ong'jachim, indiba anga  
tol'napako man'cha."

Mande an'tangni namgijanichi Isolo-  
niko ma'ekatako man'ahaon Isolni katako  
knajaha. Matchu jak uarangni ki'sangchi  
donge mogomenggipa rakualni ku'rangko  
knaenga dipetde tom'dake name re'a.  
Indiba, rakualni ku'rangko knajahacde ba  
rakual dongjaode uarang bilding bildang  
skatangtang jechiba re'angaia. Uandake  
mandeni kamba ong'a. Isolni ku'rangko  
knaenga dipet, ua namako daka indiba  
Isolni ku'rangko knajahaon ua skatang  
jechiba re'a aro jekoba daka.

**Mande ong'telaigiparang baksa dakrika.**

Isolni beng'ako manie Eden Bario  
dongengmiting somoirango Isolni ong'at-

gimin pilak matburungrang baksa Adam aro Hoba nangrime aro kusi ong'e janggi tangna man'achim. Indiba Isolni beng'ako ra'jahaon uamang pilak baksan dakgrikna nangaha. A'bachengao Isol mandena a'gimikni pilak dakgiminrangni kosako bilko man'china gita on'aha. Matburungrangba una kenachim, aro una bamachim. Adam aro Hoba, Isolni ge'etanirangko manienga dipet pilakan namtokachim. Indiba Adam aro Hoba Isolni ge'etanirangko pe'e Isoloni ma'ekatako man'ahaon, Isolni miksongoaoni dingtang ong'e pilakkon dingtang dakna a'bachengaha.

Manderang Isolni on'giminrangko Isolni ska gita jakkalgija an'tangtangni ska gita jakkalon an'tangtangna dukko ra'baronga Mesokna gita, an'ching iarangko janapna man'gen. Isol an'chingna mi misiko song'e cha'china on'aha; indiba mitam manderang mi misiko song'e cha'ani pal churangko song'e palskaaha aro ringskaaha. Indake dakon uamang an'tangtangna bang'a dukrangko ra'baa. Isol manderangna an'tangtangna jakkal-togipa ostrorangko, gitchi, gitshima, atte, rua, aro ugita gipinrangko dake jakkal-china gita silrangko on'aha. Indiba mande Isolni katako manigija uarangko slai, sel'u,

aro ugita gipin ostroranko mandeskako so'otnasa tariskaaha. Indake Isolni skaoniko mandeni skaona dingtangatahaon mande an'tangna dukko ra'baronga.

**Mande mandeska baksa dakgrikna nangaha.**

Kain aro Abelni golpoo, adasa ong'oba mitchigrikna man'a ine an'ching nika. Mande an'tang jongadaskako mitchigrikna aro so'otgrikna nanganin mamungba a'sel dongjachim. A'songsa a'song gipinko aro jatsa jatgipinko mitchigrikna nangani mamung a'sel dongja. Apsan nangrime janggi tanganian nambata ine darangan uia. Indiba, an'ching, a'gilsakoniko niate niode tom'tomaniko aro mandeska a'songska baksa meligrike janggi tanganiko nikja. Saksa sakgipinko mitchigrike janggi tanganian nambatama, ba saksa sak gipin baksa meligrike tom'tome janggi tangan nambata, ine sing'ode darangan aganchakgen, saksa sakgipin baksa meligrike janggi tangan nambata. Indiba, janapbagimin gita, a'gilsako manderangni janggi tanganiko niate niode, mandeska mande baksa, a'songska a'songska baksa dakgrikanian gapaia ine nika.

Indide tom'tom dongan nambata ine an'ching uiode, mainasa mandeska baksa

ba a·songska baksa jegrike dakgrike janggi tanga ? Ia sing·anina an·ching indakesan aganchakna man·genchim, mande Isoloniko ma·ekatako man·ahani gimin ua mandeskani namgniꝋa chanchijaha, indiba, an·tangni man·dapaninasa chanchiaiaha. Indake ong·on, an·ching dakgrikaniko jegrikaniko pangnan nikronga. Jekai, mesokatna gita, mande sakgni badiaba namgipa biapko a·ba cha·na ske a·a o·na am·on, an·tangsꝋa skang o·na ske jegrikronga. Mandeni kam da·o pangnan indake ong·aha.

### **Mande Isol baksa dakgrikna nangaha .**

Mande Isoloni dingtang ong·e janggi tangahaon ua Isolni bobil ong·aha. Nok gimik melie janggi tangode saksa sakgipinko uigrika aro saksa sakgipinni katako manigrike ka·sagrika. Dedrangba pagipani ku·rangko knaon kusi ong·e pagipaona chabaa, indiba degipa pagipani katako pe·ahaode, aro pagipana bamjahadeindide, ua pagipani ku·rangko knanma sikjaha, aro pagipani ku·rangko knaon pagipaoni katna sikskaaha. Indake ong·on, pagipani ku·rangko knana skani pal, pagipani ku·rangko knaon una kene unoni katna sikskaaha.

Pagipani katako manie noko jonga-daskarang baksa janggi tangmitingo ua nokoni ong'katange noksul songsulni bisaskarang baksa kal'grike rona gita cholko man'achim. Indiba ua burungchi katange dongeode, jakgitela gita nikoba bakbakan jakgitelja aro kenanirang donga ine chanchina aro una a'bachenga. Pagipani noko pagipani ning'o dongmitingo bis'a, walni somoloba kenna nangani dongja, maina uni nagipa una simsakachim. Indiba burungo saksan dongode kenani bang'a maina una simsakgipa darangba dongjawachim.

Isoloni ma'eke janggitanggipa sakan-tinan kenani bang'a. A'gilsako samtangtangchi duulenggipa namgijagipa bobilrangna ua kenna nanga. Ua an'tango ka'dongna man'ja, maina, ua bobilrangko warachakna amna gita uo bil chu'ongja. Isolni ku'rangko knanaba ua da'o kenaha, aro knana sikjaha. Isol gri janggi tanggipa mande sikarini mikkango katenggipa matburung gita ong'a.

## PAP JELROROGIPA'SABISI ONG'A

Basakoba basakoba papko an'ching  
an'chingni be'enno donggipa an-



chinek gita mangmang chanchimana, aro papko indake chanchiani ong·jasrangde ong·ja. Indiba, an·ching papko an·chingni be·eno ma·bake dongenggipa an·chinek gita chanchiaiode, papni ning·tuaniko an·ching rongtale uina man·jawachim. Chongipa bi·sa bija bitchiko ba mitaiko cha·ode uni ku·siko nangripake mitchi mitchi daka. Indake ong·on, ma·gipa chi ding·ao ba·rako sim·e bi·sani kusikoniko moilako ipake galna man·aia. Mitam manderang papko indake chanchia. Indiba mandeni bigilo donggipa moilana bate bata. Mandeni papko mandeko saatgipa sabisi gita an·ching chanchiode indide, papni ning·tuaniko uina an·ching krabate man·gen.

**Mande sabisiko ia minggitam cholrangchi man·ronga .**

An·chingni sabisiko man·ani a·selrangni gimin sandie niode ia minggitam a·selrangan mongsongbatgiparang ong·a ine an·ching nikgen. Ia minggitam cholranga, ma·a paachi, mandeskachi, aro an·tangni simsakgijanichi.

Bang·a an·chingni saa ding·anirangan an·chingni ma·a paaoni an·chingo batronga. Be·enni saa ding·a, ma·a paaoni an·chingo baton, beben bi·sani dos ong·ja, indiba

bi-sa saako man'on uni dukko chakna nanga. Uni dukoni dos ong'oba ong-jaobau jokna man'ja.

Aroba basakobara, ma'a paachi ong-jaoba, mandeskachiba ong'ronga. Indake saa ding'aniko an'ching mandeskaoniko man'on, basakobade ian an'chingni simsakgijachi ong'a indiba basakobade an'chingni simsakgijanichi ong'ja. An'ching mandeksa baksa pangnan dongna nangani gimin mandeskani sabisioni an'ching jok-srangna man'gen ia ong'ja. Saksa mande konchi cha'giparang baksa ruute dongna nangode, aro uno an'tangko champengani sam dongjaode ua ruutgijan konchi cha'ako man'pachongmotgen.

Indiba bang'a saa ding'anian an'ching an'tangtangni simsakgijanichi ong'rongbata. Mesokatna gita, mande saksa rongtalgija janggi tangode, a'segija cha'ode, moila chiko ringode, be'eno saa ding'ako bakan man'gen. Indake ma'manti rok-rangko an'ching an'chingni simsakgija janggi tanganichi man'ronga.

**Papni sabisi ia a'selrangchi giprroa.**

Be'enni saa ding'a jedake giprroa, papni sabisiba uandaken giprroa. Papni

sabisini giproroani a·selrangko an·ching sandie niode ia a·selrangan mongsongbat-giparang ong·a ine nikgen. Ia a·selranga, ma·a paachi, mandeskachi, aro an·tangchi.

Papni sabisi an·chingni ma·a paaoni batrikrikronga. An·chingni ma·giparang an·chingko papo oko keahani gimin, an·ching ma·gipa pagiparangni papko man·rikrikgiparang ong·aha. Indake, darangba namtena skoba namtena man·jaha, maina, mande papo atchie, papo dal·bagipa ong·aha. An·chingni sambao donggipa manderangni sabisioni an·ching joksrangna man·ja gita, an·chingni sambao donggipa manderangni papni sabisi an·chingo batronga. Indake ong·ani gimin an·ching sakantian a·gilsakna chanchianirang, a·gilsakni pilak gamna rasongna, mikbokanirang donga. A·gilsakni darang mandeba a·gilsako dong·e a·gilsaknirangko am·gijagipa dongjawa. Ia papni sabisi an·ching sakantikon ma·rang nangataha.

Indiba, bang·a papni rokrangko an·ching an·chingni simsakgijanichi man·ronga. Rongtalgiya chiko ringe, a·segija cha·e, be·enni rokko man·a gita, namgiya chanchianichi, namgijana jaku ga·anichi, namgijana miksonganichi an·ching papni

sabisiko man·ronga. An·ching simsake janggi tangode indakgipa bang·a namgi-jarangoni jokna man·genchim.

**Papni sabisioni an·sengatani cholrang.**

Papni sabisiko, ma·gipani bi·sani ku·sikoni moilako chi ding·ao barako sime ipake gala gita, altuae galna man·ja. An·ching papni sabisioni an·sengatako man·na nangode indide an·ching indake uina nanga. Indake uijaskal an·ching an·chingni papni sabisioni an·sengatako man·jawachim. Ia uina nanganiranga, "Anga saaenga; anga an·sengna nanga, aro anga nimgen."

Bang·a manderangan saa ding·ako man·oba an·tangko saenga ine ku·rachakna sikja. Indake konchi cha·ako man·gipa mande-rang skanggipa pari nakatchengani somo-iode indakesan aganaia, "An·sengenga, saja. Iarangde maiba mintotasa; ia nachil ritchaa gita, ku·chil dandila gita dakani-rangde, mainiba a·selsa ong·a." Iandaken papni sabisiko man·gipa mande sakantiba ong·a. Uamang·ni indake aganako an·ching knaronga, "Angaba apsanaia, re·anggipa robibaro giljachil re·gijade sko saani giminsa." Beben basakoba basakoba sagipa mande an·tangko saaenga ine uia, indiba ua an·tangni saaoni an·

sengsrangnade sikja. Ua indake aganronga, "Angade an'sengade ong-jaenga indiba maiko dakgen, ojabā namatna man'ja "Nama oja donga ua nangni saako an'sengatna man'genine agane on'oba ua indakesan aganrongaia, "Sam ra'bejok, namja." Indake pa'ske agana-nirangko an'ching pangnan nika, aro knaa. Iamang an'tangtangni saaoni an'sengna sikchongmotgiparang ong'ja. Indakgipa manderang bilongrooe sironga.

Papni sabisiko man'gipa manderangta apsan. An'tangtangko papirang ine uamang uia, aro pap ka'ani namja ineta uamang uia. Indiba, papni sabisicni joksrangna uamang sikja. Unigimin uamang'na an'ching dal'gipa oja, Jisu Kristoni gimin agane on'oba uamang gisik nangja, beben uamang ua an'chingni paprangko rongtalatna man'a ine uia indiba uamang unona re'bae an'sengtako man'na sikja. Indakgipa manderang an'tangtangni papni sabisicni an'sengna sikchongmotgiparang ong'ja.

Mitamrang an'tangtangko saenga ine uia aro ojachi re'e sam ra'naba donga. Indiba uamang nimna sikja. Uamang okgitchak sae atamo sam ringe pringo

te·gatchu cha·taigipa manderang gita ong·-  
aia. Bang·a manderangan chu ringa nam·  
ja ine uia. Indiba kristian dakbewalrangko  
ja·rikchina aganode uamang ja·rikpana  
sikja. Robibar atamo chu ringako gisik  
pil·e sombar pringo chu dokano a·songe·  
taigipa manderang gita uamang dakaia.

### **Pap aro dakmajoani .**

Pap aro dakmajoani dingtanganiko an·  
ching rongtale ma·sina nanga. Mande  
ripengtangna groko chotna man·jaode  
namen duk ong·e ua saniba tangkako  
cha·una dakmajoaniko man·naba donga,  
indiba ua cha·una nangade ong·ja. Una  
indake saniba tangkako cha·ue groko chotna  
chanchion, “Anga cha·ue pap ka·jawa ine  
ua chanchina man·a.” Indiba mande in·  
dake aganrongbreja, batesa maiba dak·  
majoanio ga·akon an·ching pa·skanikosa  
aganna joton ka·ronga. Adam aro Ho·  
bani sal intalan mandeo indakgipa chan·  
chiani gisik dongbaaha ine an·ching agan·  
baaha. Adam an·tangni dosiko ra·gija  
Hobako matnange aganaha. Uandaken,  
Hobaba an·tangni dosko ra·gija chipukosa  
dosi galaha. Matburung pap ka·na man·  
ja maina matburung nama aro namgijako  
uija. Matburungrang·okkria, ringna ska,  
aro kenako uia, indiba, matburungrango

nama namgijako uiani gisik dongja. Indake ong'ani gimin matburunrang pap ka'na man'ja. Mandeko Isolni jagring gita ong'atahani gimin mandesan nama namgijako uia, aro nama namgijako uie mandesan pap ka'na man'a. Aroba, mande nama namgijako uiani gisik dongani gimin uko dakmajoronga.

Iana agreba an'ching minggipinko uina nangani dongkua. An'chingona dakmajojani sokbaon darangba indake agana man'ja, "Angko dakmajojani bilongduggaa." Mandeko dakmajojani bilongdugaani dongja. Maina an'chingni bilni warachakna amanina agre an'chingko dakmajorongja. Ba an'ching indake agana man'ja, Pilakan indakede dakrongaia, uni giminsa anga iako daka, iakode pap ine an'ching chanchina man'ja." Namgija, manderangni dakrongahani gimin nama ong'aina man'ja. Manderang dakrongoba dakrongjaoba namgijade namgija ong'aia. Manderang jekoba aganbo, wa'alde pangnan kama. Iako aganachi an'ching pa'skani katakosan aganronga. Unigimin angni dakgiminna anga dai nanggipa ong'a. Indiba an'ching an'chingni dakgimin paponi jokna skode, pa'skachi ong'ja, indiba, an'chingni gualaniko ku'rachake kema bi'anichisa man'a.

## ODAI. IV

# KA·SAANNI RENGSI.

## MANDE AN·TANGKO JOKATNA MAN·JA

Mandeni an·tangko jokatna man·gijani a·selrangni gimin aganna bang'en man·genchim. Indiba iani bidingo kan·dikbee indake agana ska. Mande, Isolni jagring gita ong·atako man·ahəoba, ua pap ka·ahani gimin Isolni miksangani gita ong·jaha. Papni a·sel mande Isoloni dingtangatako man·na nangaha. Janggi jokaniko man·na mande Isolni kema watako man·na nanga. Indiba Isolni kema ka·ako man·na nanggenchimode mande Isolona re·bapilna nanggenchim.

A·bachengao an·ching mandeni pap ka·chenganini gimin Adam aro Hobani golpoko poraiaha. Adam aro Hoba pap ka·ahaon Isolni ku·rangko knae Isolona re·bana skani pal Isolni ku·rangna kene Isoloni kate jokna dongnuaha. Pap ka·gipa mande sakantini kam da·oba indake apsan ong·kuenga. An·ching pap ka·



ahaon Isolni kurangko knana kenaha aro Isoloni jokna ske Isoloni dongnuaha. Mandeni kam indake ong'ani gimin mande mamungdakeba an'tangko jokatna man'ja.

Aroba minggipin, an'chingni janggi jokani paponi jokanisan ong'aja, indiba, jringjrotni janggiko man'aniba ong'a. Indiba, jringjrotni janggi Isolni on'asa ong'ani gimin, mande iako an'tangari man'na man'ja. Indide, an'chingni janggi jokania, paponi joke Isol baksa 'ong'taipilani ong'a.

A'gilsakni darang gipin toromrangba mande maikai Isolona soktaipilna man'gen ia cholrangko mesoka. Uni gimin iani bidingode pilak toroman apsan ong'a. Indiba gipin toromrang, jekai, Hindu torom, Islam, Budhist, ba gipinrang, mande Isolona sokpilna nangode kema watako man'chengna nanga ine skiani ong'ja. Aroba ia toromrang mandeni papko kema watna man'ja, maina, ia pilak toromrang'an mandeni toromrangsan ong'a. Indiba Kristian torom mandeni torom ong'ja, indiba ian Isolni mandena on'gimin torom ong'a. Indake Kristian torom Isolni torom ong'ani gimin, Kristian torom mandeni papko kema watna man'a.

Kristian torom Isoloni ong'a ine an-ching maikai uia ? An-ching maio pang-chake an-chingni toromsan Isoloni ong'a, pilak gipin toromrangde mandeonisan ong'a ine agana ? Tarangko an-chingni aganani a'sela Jisu Kristoni gimin ong'aha. Jisu Kristosan Isolni de ong'e mandeni papko kema watna man'a, aro iako dakna darang toromni dilgipaba man'ja, maina uamang'a manderangsan ong'a. Indide an-chingni skanggipa sandina nangania, "Jisu Kristoa sawa ?"

## JISU KRISTOA SAWA

Bilsi hajalgni mang re'angaha, Palestine a'songni Bethlehem minggipa chongipa songo bi'sa saksa atchjaha. Uni atchion ong'ronggijanirang ong'aha. Indake ong'ahaoba ua darang songni bisarang gitan dal'roroaha, aro mistrini kamko dal'a chu'sokahaon ka'aha.

Bilsi kolatchi mang ong'ahaon, ua Jordan chibimao Johan Napbolatgirani jakchi napbolatako man'aha. Johanni jakchi Jordan chibimao napbolatako man'ani ja'mano ua skiprakna a'bachengaha. Uni indake skiprakako manderang knaon,

sandina a·bachengaha, “Iara sawa ?”  
Da’o ua an·tang baksa adita ripengrangko  
chimongaha. Ia chimonggimin uni ripeng-  
rangkon sninggiparang mingachim.

Uni sninggiparang pilakan ramram man-  
derangsan ong·achim. Pitor, aro Johan  
na·tok rim·e cha·giparangsan ong·achim.  
Mati kajina gilgipa mandesan ong·achim.

Jisuni kam aro skianirang pilakkon an-  
ching uitoka. Uarangko an·chingni uitok-  
na man·ani a·selranga, uni skianirangko  
uni sninggiparang see donangtokahani  
gimin ong·aha. Uamang·ni see donang-  
giminrangko an·ching sastroo nikna man·a.  
Ia sastroo segimin golporangkoa sning-  
giparang an·tangtang banaie seaha ine an-  
ching agana man·ja. Iarangko an·tang-  
tangni nkgimin aro knagimin mancha-  
kon uamang see donangaha.

Jisuni sninggiparang Jisuko ja·rikan  
bakan jajaani ong·aha. Uamang·ni ski-  
giparangoni, aganprakgiparangoni aro dec-  
tor-rangoni Jisu dingtanga ine uamang  
bakan nikaha. Ong·ronggijako uamang·ni  
nikania, salsao uamang Jisu baksa chongipa  
ringo sagalko choangengachim. Rang·san  
sagalo balwa ta·rakaha aro chipakore pilak-

chin sataha. Umang·ni chongipa ring dubinasiengahachim. Indakmiting somoio Jisude tusiengachim. Sninggiparang kene Jisuko demesaaha, aro Jisu balwa aro sagalko indataha, unon balwa ta·raka aro sagal chipokpeka tom·tomaha. A·gaona sokpilon uni sninggiparang sing·grikna a·bachengaha, “Iara Sawa ? Balwa aro sagalba una bamake !”

Jisuni sninggiparang Jisu mande ram·ramsan ine uia. Sakgipinrang gitan ua okkria, aro cha·aniko nanga, sakgipinrang gitan uaba neng·paa aro tusina nanga. Indiba, ka·sne ka·sne uni aiao inmanani kamrangko nikoa, aro uni aiao inmangipa katarangko knaoa, ia mandearang gipinrangoni dingtanga ine uamang nikaha. Ia mande Jihudirangni ruutbea bilsirangna nisengsoenggipa Messiah chong·motan ine uamang uiaha. Iako Pitor uichengaha, aro uni ja·mano pilak gipin sninggiparangba uiaha. Beben Jisu Kristoa, mande·rangko jokatna Isolni ku·rachaksogipa Messiah ong·bebeachim.

Jisuko chisolo datkapaha, sninggiprang iako nikaha. Uko gopaha, aro Robibar pringo ua a·kolo dongjaha ine uamang nikaha. Da·osa uamang Jisuni gimin

rongtalbate uiaha. Jisuni sninggiprarangoni Thomas Jisu sigiminoni chakatpilaha ine beberajaha. Gipinrang iani gimin aganon ua indakesa aganaha, "Anga uni jakpao gojalni pariko nikjaskal, aro gojalrangni pario jaksitangchi jotdape nina manjaksal, aro uni oksiko seluchi su'ani pariko dangtape nina manjaskal anga beberajawa." Indake Jisu sigiminoni chakatpilani jamano ua Thomasna aganaha, "An gni jakpao gojalni pariko aro angni oksiko seluchi su'ani pariko nangni jakrangchi dangtape nibo." Iako nikani jamanosa Thomas indake aganaha, "Angni Gitel, aro angni Isol."

### **Jisu Mande chongmot ong'a.**

Jisuni gimin Kristianrangni beber'ani minggniko janapna mangen. Skanggipao Kristianrang Jisu mande chongmot ine uamang beber'a. Ua me'chikni oko atchiaha, aro gipin manderang gitan agilsako janggi tangaha, dakmajoako man'aha aro siaha. Indiba ua dakmajoako man'ahaoba uo pap dongjachim. Ua papni ningtuako uiachim, papara mandeko Isoloniko dingtangata ine ua uiaha. Uni gimin ua chisolo indake aganaha, "O angni Isol, na'a maina angko watgalaha?" Indiba, ian an'tang pap donge Isolni galchip-

ako man·gipa mandeni kata ong·jachim. Uo pap dongjachim. A·gilsako katchi-nikgiparang, gisik seng·giparang, skia man·giparang bang·aha, indiba, darangba Jisu gita pap donggijagipa mande dongjaha.

### **Ua Isolni Depante ong·a .**

Gnigipao, Jisu mandechong·motsan ong·aija, indiba, ua Isolni Depante chong·motba ong·a ine Kristianrang Jisuko be-bera·achim. A·gilsakko ong·atna skangon, ua Isol baksachim. A·gilsakko ong·atani ja·mano Isol uko a·gilsakona watataha. Isol an·tangni Depanteko an·tangni ska gita ong·atna man·genchim. Dal·gimin mande gita ong·jolate ua uko aramon chokonjolatnaba man·genchim. Indake ong·jaoba, Isolni namnika ong·genchimode, Isol uko a·koloni ong·katatnaba man·genchim. Indiba, Isol an·tangni Depante-ko me·chiko atchiatna namnikahani giminsa Ua uko me·chikchi atchiataha.

### **Jisuko Isolni Depante ine bebera·ani a·sel-rang.**

Kristianrangni Jisuko Isolni Depante ong·a ine bebera·ani minggitam a·selrang donga. Ia minggitam a·selranga, Jisu an·tangni gimin iako saki on·aha aro gni-

gipao, uni sninggiparangba Jisu Isolni Depante ong'a ine an'chingna saki on'aha. Iana agreba, bon·kamao, pilak chasongo Jisuo bebera·giparangan iako agana.

Indide, Jisuni sakirangni gimin nibo: uni kam aro katarang pilakan ua Isolni De ong'a ine an'chingna saki on'a. Ua ia katarangko an'tangni gimin aganaha.

“Angan a·gilsakni seng'a.”

“Mandeni Depante manderangni papko watna a·gilsako bil gnang.”

“Angan rama aro bebe aro janggi.”

“Abrahamna skang anga donga.”

“Angko nikkipan Pagipako nikaha.”

“Anga aro Apa apsan.”

Jisuni ia sakirangna agreba, uni sninggiparangba Jisu Isolni Depante ong'a ine an'chingna saki on'aha. Jisuni sninggiparangna Jisuko Isolni Depante ine bebera·na altuani ong'aha. Jisuko uamang rongtalen uiachim. A'amang uni ma'ako, uni paako, uni jong·nodrangko uachim. An'tangtangni indake uigipa mandeko maikai uamang Isolni De ine bebera·na man'a ? Iana an'ching mingsakosan aganchakna man'gen, ia aganchakania, Ua Isolni Depante ong'chongmotahani

giminsa uamang iako agana ga·akaha. Aroba, iana agreba, Jisuko uamang Isolni Depante ine bebera·anio namen duk aro a·rikako man·aha. Iako bebera·ani a·selan uamang patoko donako man·aha uamang·ko a·rikaha, uamang·ko mitchi·aha, uamang an·tangtang jik dedrang ma·drangko gimaataha. Indiba iarang pilakko uamang chakna nangahaoba, uamang Jisuko Isolni De ong·ja ine jena man·jaha. Indide, Jisuko uamang·ni Isolni Depante ine bebera·ani a·sela, uamang uni kam aro kataon ua Isolni Depante ong·a ine nikahani giminsa iako indake rake saki on·aha. “A·gilsakko jokatzipa ong·china Pagipa Depanteko watataha inc chinga nikaha aro saki on·a.” 1 Joh. 4:14.

Iarangsang ong·aia, indiba da·ororon Jisuo bebera·gipa manderangba Jisu Isolni Depante ong·a ine sakiko on·a. A·gilsakni je bianaoba donge bebera·gipa ong·ja maina, ua ansankon agangen, “Jisu Isolni Depante Ong·a.” Indake Jisuo bebera·gipa sakantini saki on·ani a·sela, Sastroo seaniko nike Jisu Isolni Depante ong·a ine saki on·anisan ong·aia, indiba, uamang iako an·tangtangni janggi tanganio uichong·mot·ahan giminsa indake saki on·aha. Indake ong·ani gimin uamang sina nang-



oba, ma·drang bakdrangko watna nang-  
 oba, ba ongjaode ma·manti du·rangko  
 chakna nangoba uamang Jisuko Isolni  
 Depante ong'a ine jechakna man·jaha.  
 Uamang Jisu Isolni Depante ong'a ine  
 ku·rachaknan ga·aka.

## JISU MAIKO DAKAHA

Jisuni kamrangko sandiate ua maiko  
 dakaha ine an·chingo saoba sing·ode bang-  
 en agana man·gen. Ua manderangna  
 Nama Katako aganprakaha; uni Nama  
 Kata manderang jedakode Isol aro mande-  
 ska baksa gital ramao janggi tange re·ru-  
 rana man·gen iako mesokaha. Ua man-  
 derangna Nama Katakosan aganprakai  
 jaha, indiba, ua nama kamrangkoba ka·aha.  
 Ua sagiparangko an·sengataha, kanarangko  
 nikataha; korerangko a·rikaha, korarang-  
 ko re·aiaha, aro sigiminrangkoba tang-  
 pilataha. Indake kamrangko ka·e ua man-  
 derangna gital janggiko on·aha.

Bon·kamao ua manderangna janggi-  
 tangko on·e chisolo datkapako man·aha.  
 Uni pilak kamrangni gisepo chisolo man-  
 derangni papna sichakanian dal·batgipa  
 kam ong'a ine an·ching bebera·a. Uni

chisol o sianiko Kristianrang indake be-bera·a, “An·chingni paprangko kema watna aro an·chingko salgi man·atna ua siaha.” Indiba maikai indake ong·na man·gen? Mande saksani siania maikai sakgipinko salgi man·atna man·gen? Indake maikai ong·chongmota iani gimin, sandie nina.

A·gilsako donggipa manderang pap aro namgijao dongengachim. Pap aro namgijao donge uamang gimagnigiparang ong·achim. Manderangni indake gimana-siaoniko jokatna Isol an·tangni saksakamkam Depanteko a·gilsakona watataha. Indiba, Jisu Kristo a·gilsakona seng·ako ra·bae manderangni namgija kamrangko parak ong·atahaoa manderang uko namnikjaha. Uni gimin manderang uko so·ote galaha. Indakgipa namgija gisik Kiapasni ka·tongo, Judas Iskarietni gisiko, Roman Governor Pilatni gisiko napa-hani giminsa uamang Isolni Depanteko so·ote galaha. Indiba Jisuko so·ote galani ja·mano namen aiao inmangipa ong·aha. Jisu siaoni chakatpilaha. Uni gimin sia uko amjaha, batesa ua siako amaha. Indake sigiminoni chakatpile ua namgijako amsrangaha. Uko chisol o datkapanichi aro chisol o uni an·chi jokanichi a·gimikna janggi jokaniko ra·baaha. Mandeni papko

su·srangsrangaha, aro mandeko Isolona rimbapilaha. Iani gimin sastroo rongtalbee indake agana, Jisu an·chichi an·chingko su·srangsrangaha. Aroba indake agantaia, “Jisu siahani gimin an·ching tanga.”

Saksa mandeni sianichi sakgipin mandeni tanganiko an·ching nikronga. Pante saksa an·tangni dilgipako salsao namen ka·onangatbeahachim. Dal·gipa bichal ka·gipa ia panteko bichal ka·e uko sianiona ga·akataha. Ua pantena indake agana, “Na·a sina nanggen.” Indiba ia bi·sani ma·gipa ia bi·sana namen ka·sabeani gimin, ma·gipa bi·satangna janggitangko on·chakaha. Indake ma·gipani sianichi de·gipa tangrikna man·aha.

An·tangko ja·rikgiparangko Jisu bang·gija mesrang gita chanaha. Cha·urang aro namgija manderang uni mesrangko cha·una aro nisina re·banaba donga, indiba namgipa rakual an·tangni mesrangna janggitangko gimaatna nangoba warachakgenchim. Mes nirikgipa so·otako man·naba donga, indiba uni mesrang janggi jokaniko man·genchim. Mandeni janggi tanganio mandeko pap aro namgija duulronga. Mande ia namgijanirang aro pap baksa dakgrikna nangronga, indiba, mande

pangnan amatako man·ronga. Jisu re·bae mandeko jokatna dakgrikoa ua so·otako man·aha, indiba uni jokgimin an·chichi an·ching jokaniko man·skaaha.

## **JISUNI SIANICHI AN·CHING MAIKAI JOKANIKO MAN·AHA**

Jisuni sianichi an·ching maikai jokaniko man·aha iani gimin minggitamko agana man·gen.

### **Chisolan Mesokani .**

Jisuni siachi maikai mande Isol baksa nangrimatako man·taiaha, chisolan mande sakantina mesokani ong·a. Minggitam dake chisolan an·chingni mesokani ong·a ine an·ching ra·na man·gen. An·tangni janggi tanganio Jisu an·tangni janggiko on·jaskal manderang Isolni ka·saaniko ma·sijawa ine Jisu uiaha. Indake chisolosina nanggen ine uie ua donsogimin chisolosina Jerusalemchi mikkange re·ang·aha. Duk jajrenga gri janggi tange chisolosina re·angania uni bamani chong·motko mesoka. Iana bate dal·batgipa gipin bamaniko an·ching nikja.

Chisol, Jisuni bamanikosan mesokaia ong·ja, indiba ua uni bebera·anikoba me-

sokachim. Ua chisolo sina nanggenma nangjawa ianigimin ua Gathsemane bario bi·mitingo rongtale uikujaengachim. Uni dakgni kam bang·kuengachim. Ua siahaode, uni dakgni kamrangko matchotatna man·jawahachim. Indake ong·ani gimin Jisu indake agana, “Ong·na am·ode ia ringchakani angni mikkangoni chel·china.” Indiba Isolo uni bebera·ani kimkim mangrakachim. Uni gimin ua indake agantaia, “Indiba angni ska ong·ja, nang·ni ska ong·china.” Chisolo siani somoioba pagipa uko watgalaha ine ua chanchiachim. Uni gimin ua indake aganaha, “Angni Isol, angni Isol, na·a maina angko watgalaha?” Indiba, ia somoioba Isol Jisuko watgalkujachim. Pagipa uko watgalja ine ua uichongmotaha. Uni gimin ua ia somoioba indake agankuna man·aha, “Apa angni janggiko nang·ni jako pakwata.”

Aroba chisol Jisuni an·tangko on·ataniko mesokachim. Cha·ugipako gita chisolo datkapako man·na Jisuna mairongpile kratcha·ani ong·achim. Indiba, Jisu an·tangan Isolni De ong·oba an·tangni gimin chanchijaha, Ua indake aganjaha, “Mande so·otgipako gita chisolo datkapako man·on manderang angko badine chanchigen?” Ua pilakna bate dal·batgipa

ong'oba ua pilakna dangdike on'gipa ong'aha. Uni gimin ua an'tangni gimin indakesa agana, "Mandeni Depante dangdike on'ako man'ade re'baja, indiba dangdike on'a aro bang'ani pal an'tangni jang-giko piokani ine on'nasa re'baaha."

### **Chisolan Nangrimatani Ong'a.**

Jisu chisolo siachi maidake papko amna man'aha iani gimin an'ching nikbaaha. Indiba Jisu chisolo sie papni bilrangko amasan ong'aajaha, indiba, uni chisolo siachi ua mandeko Isol baksa nangrimgrikatpilaha.

A'bachengao Adamko Eden harioniko a'rikataha ine an'ching nikbaaha. Barioniko a'rikatako man'on mande Isol baksa nangrimpiltaina cholko am'aha, indiba man'jaha. Pap uamang'ko pangnan champenge donaha. Papara bariko kadule dongimin guare gita ong'a. Ia papni guareko mande pe'e Isolona re'bapilna man'jachim. Indiba Jisu Kristo chisolo sie ia papni guareko pe'e galaha, aro indake mandeko Isol baksa nangrimataipilaha. Jisu ia papni guare, mandeko Isoloni dongpengengipako pe'e galna man'a maina Jisu an'tangan Isolni Depante ong'a. Indiba ia papni guareko pe'e galna Jisuna

altuani ong·jaha, maina ua iako dakna  
an·tangni janggiko on·na nangaha.

Ua mai dukko chakchikjok  
An·ching uina man·ja ;  
An·chingna uno datkapjok,  
Iako bebera·a.

An·chingni papko watsrangna  
An·chingko namatna,  
An·chingko salgi man·atna,  
An·chitang on·aha.

### **Chisolan boli ong·a :**

Chisolan an·chingna Jisuni on·chakram  
boli ong·a. Beben ka·onangenggipa mi-  
teko namatna gita matburungko boli on·a  
Jisuni chisolo sianiko an·ching chanchina  
man·ja. Indiba uni siani boli ong·chong-  
mota.

Mande saksa sanaba gro nangode ua  
uni groko chotna nanga. Ua an·tangni  
gro nangako chotna man·jaode, ba an·  
tangni groko chotjaode manderang uko  
kakketgipa mande ine chanchijawachim.  
Mande pap ka·e gro nanggipa ong·aha.  
Uni gro sia ong·achim. Ia groko an·  
ching chotna ga·akachim. Indiba Jisu  
Kristo re·bae an·chingni ia groko chotaha.  
Uni an·chingni groko chotanichi an·ching

an·chingni grooni joke siaoni jokgiparang ong·aha.

Jihudirang Isolna boli on·on nambatgipa matburungkosa on·achim. Ong·sia gnanggipa matburungko jedake, saa dongako, kana ba kora ba ong·sia dongako uamang boli on·na man·jawachim. Indake nambatgipa matburungkosa uamang Isolna boli on·achim. Uamang ia nambatgipa matburungko so·ote, uni an·chiko ganchio satkikie Isolna boli on·achim. Niam Gitalo, papni groko tangka ba sona, ba matburungni an·chichi chotna man·ja ine an·ching nika. Indiba gamchatbegipa ong·sia grigipa mes bi·sani an·chiko chong·motan, Jisu Kristoni an·chiko on·esa ua groko chotaha. (1 Pit· 1:18,19).

Aroba Niam Gitchamo boli on·ani bidingo iakoba an·ching nika. Kamal dal·batgipa mes ba do·bok bi·sani an·chiko ra·e Rongtalgipa biapona re·ange bilsio changsa manderangni papna boliko on·a. Iako nangrimatani salo bilsio changsa on·achim. Bilsio changsa on·ani miksongania, ia on·gimin mes ba do·bok bi·sani an·chi bilsisana gamchata ine uamang bebera·achim. Indake ong·ani gimin umang



bilsiantin iako dakna nangachim. Aroba  
 ian Jihudi manderangnasan ong'aiachim.  
 Indiba an'ching Niam Gitalni skianiko  
 nion, Jisu Jihudirangnisan Kamal  
 dal'gipa ong'aigija pilak mandeni  
 kamal dal'gipa ong'a ine nika. Indake  
 pilak mandeni kamal dal'gipa ong'e ua  
 changsano chu'sokgipa boliko on'aha.  
 Jisuni on'gimin an'chi bilsa sanasan ong-  
 aijaha, indiba, jringjrotna ong'aha. Jisu  
 changsano pilak mandena boliko on'aha.  
 Indake a'gilsakni je biapo donggipa man-  
 deba da'o uni an'chichi jokataniko man'a.

## DA'O ANGA MAIKO DAKNA NANGA

Ian an'ching bon'kamgipa sing'ani  
 ong'a. Ia ki'tapko a'bachengaoni bon-  
 kamaona poraigipa sakantian Isol aro  
 Mandeni gimin uina ske poraiaha ine  
 chinga chanchina man'a. Iako poraigipa  
 sakantian iano segimin pilakkon ong-  
 niktokna, ba, ong'niktokjanaba donga.  
 Indiba jerangan iano segimin pilakkan  
 kaket ong'a ine nika uamang da'o gisik-  
 tangtango indake sing'enggen ine chinga  
 chanchina man'a. "Kristoni nama sning-  
 gipa ong'panara da'o anga maiko dakna  
 nanga ?" Indake sing'enggiparangna adita

dakchakani ong·gnigipa aganchakanirangko on·atenga.

### **Anga saksanja.**

Paptangni a·sel janggi jokaniko am·giparang, “Angasanja,” ine uina nanga. An·ching gita janggi jokaniko am·giparang, ba paptangni a·sel duko ga·ake dongeng-giparang an·chingni samtangtangan bang·a. Indakgipa manderangko an·ching an·chingni songrango, an·chingni noktango, ba je biapoba nikgen. Indakgipa mande sakantian ia sing·aniko sing·enga, ‘Jokna anga maiko dakna nanga ?’

### **Jokna sikhgipa Sakantina ka·dongani donga.**

An·ching an·chingni paprangoni jokna skon ia indakgipa gisik Isoloni ong·a ine uina nan a. Indake sandigipa sakantinan ka·dongani donga, maina Jisu agana, “Angona re·bagipa sakantiko mamung-dakeba anga a·palchi galjawa.”

### **Namgipa ki·tap dakchakgen.**

Paptangoni jokna chanchiani nabaon, ian Isoloni ong·a ine an·ching uina nanga. Da·o Isolni an·chingna miksonganiko an·ching uisrangna man·na gita an·ching sas-troko, chong·motan Isolni katako poraina nanga. Okkria gita an·ching Isolni katako

sandiosa Isolni an·chingna miksonganiko an·ching rongtale uigen. Indiba, minggipin an·chingni am·anio an·chingko dakchakgnigipara, namgipa ki·tapan ong·a. Mesokatna gita, Songregipani Songreani. Ia ki·tap namgipa ki·tap ong·chongmota. Ia ki·tap mande maikai paptangni bojaoni jokna joton ka·aha, aro maikai Chisolona re·bajaskal bojabatango galna man·jaha iani gimin an·chingna rongtalbee mesoka. Beben an·ching Kristianni gronga pilakkon gronggen ine ka·dongna man·ja, indiba, an·ching sakantian ia a·gilsako donge songregiparang ong·ani gimin ia ki·taponiko bang·en skie ra·na man·gen.

### **Papni boja.**

Kristian sakantian papni bojani jrimako uia. Janggiltango papni jrimbegipa papni bojako boe an·ching songregiparang ong·a. Indakgipa jrimbegipa papni bojako an·ching bang·a gipin cholrangchi galna joton ka·ronga. Indiba indake jokna joton ka·oba an·ching man·ja ine nika.

Mitam manderang paponi jokna ma·gipa pagipa, jonggipa nogiparangchi joton ka·a. Indiba, uamang sakantiba an·ching gita an·tangtangni papni bojarangoni jokna joton ka·giparangsang ong·a. Uni gimin

uamang an'chingni papni bojako an-  
 chingoniko chel'atna man'ja. Mitam  
 manderang papko ritchege ra'e papni  
 bojaoni jokna joton ka'a. Mande  
 ong'ani gimin pap ka'gija dongna  
 man'ja ine uamang agana. Papni gimin  
 an'ching bang'e chanchina nangja,  
 maina pap an'chingna indita chanchina  
 nangani ong'ja ine uamang agana. Beben  
 cha'miting, namiting salrango mande in-  
 dake chanchinaba donga, indiba, nam-  
 jabegipa obostarang unona sokbaon, man-  
 derang indake aganrongja, aro ua salo  
 an'tangtangni papni namgijako uie jokna  
 ska. Beben mitam manderang pap nam-  
 jachong'mot ine uia, indiba papni namgi-  
 jako maichiba gualna man'a gita chol-  
 rang donga ine aganskaa. Ua cholrangoni  
 mitamranga, mesokatna gita, a'gilsakni kusi  
 ong'anirangna ong'a. Unigimin mande  
 chu ringode aro ma'manti kusi ong'ani-  
 rangko dakode indide ua uni papni nam-  
 gijaoni chel'na man'a aro papni namgi-  
 jako gualna man'a ine chanchia. Haida,  
 mande chu ringe pekmitingo papni nam-  
 gijako guale paponi jokna man'a gita  
 chanchinaba donga, indiba, ua chu peka  
 namahaoa an'tangni namgijako gualna  
 man'ja. Ua an'tangni namgijani giminan  
 chanchipiltaina ga'aka.

**Chisol.**

An·ching an·chingni papni bojaoni jokna skode chisolona re·bana nanga. Indiba, an·ching papni bojako ra·e songreangmitingo, chisolona sokaha ine maikai uigen ? Indake an·ching chanchinaba donga. Indiba, gisik gnanggipa songregipa ramani gimin sandichenggija saksan songrejawa. Ua an·tangni re·gni ramako rama nikgiparango sing·chengesa ba ong·jaode rama nikgiprang baksasa re·pasranggenchim.

Indide, Jisuni ramako re·na ske rama brangna kengiprang ba chisolko nikgualna kengiparang, chisolni ramako nikgiparango sing·chengna nanggen. Chisolni ramako nikgipa manderangni gimin sastroo bang·en agana. Aroba Mondoli chisolni ramako re·e songregiparang ong·a. Uanigimin chisolni ramako re·na sikkipa manderang Mondoli baksa ba ong·jaode ia rama nikgiminrang baksa re·pana nanggenchim. Aro Sastroo indake agananiko an·ching nikgen, "Doktikbo, unon na·simangna do·ga oso·gen." Indide na·a maina doktikjava ? Iana agreba indake seako an·ching nika, "Am·bo unon na·simang nikgen." Indide, an·ching maina am·java ? Jisuni sakanti unona re·bagipana ku·rachakan giminba chanchibo. "Angona re·bagipako anga

mamung dakeba a·palchi galjawa.” Indide na·a maina dongchipa ?

**An·tangona re·bagipa sakantikon Isol ra·chaka.**

Je a·songoba ong·ja maina, an·ching Isolni ka·saani gimin aganna nangode indakgipa toanichi agangenchim. Saksa mandeo depante sakgni dongachim. Ua·mang·oni depante chonbatgipa an·tangni pagipana indake aganaha, “Anga da·ode chu·onga gita leka pora man·aha uni gimin anga songo donge a·a game matchu nirike cha·na sikjaha. An·chingni songo ang gita leka pora donggipana mamung cholko dakna man·ja uni gimin anga da·o an·tangna cholko dake ra·na gita dal·a jilachi re·angna angna bang·a tangkako on·atbo.” Pagipa depanteko duk ong·atna sikjae una bang·a tangkako on·ataha, An·tangni tangkako ra·e ua pante dal·gipa jillachi re·angaha.

Dal·gipa jillaona sokon ua an·tangko tangka bang·gipa gita chanchie namgipa, dam rakgipa Hotelo dongeaha. Ruutgijan bang·a ripengrangko ua man·aha. Uni ripengskarang uko namnikachim, maina ua uamang·na bang·a tangkarangko koros ka·aha. Ua uamang·ko cinema nidilaha,

chu ringdilaha, joa kalidilaha aro ma-  
 manti namgijarangko dakdilaha. Ua an-  
 tangna dam rakani cholarangko, longpen-  
 rangko breaha. Jillao donggipa me'chik-  
 rangba uko namnika dakmikaha, maina  
 ua uamangnaba bang'a tangkarangko koros  
 ka'ahachim. Indake tangka dongmiting  
 salrango ua kamko am'jaha, aro am'na  
 simsakjaha. Kamko am'ani pal indake  
 simsakgija janggi tanganichi ua an'tangni  
 tangkako koros ka'e bon'ataha. Unon  
 uni nokoniko ra'bagipa tangka ruuta  
 jarangna chu'ongjaha. Tangka bon'angeng-  
 aha ine nikon adita salrangna sakgipin-  
 rangoniko ra'chake choliatna man'aha,  
 aro indake uni ripengrangko ua kusi ong-  
 dilna man'aha. Indakmiting salrango ua  
 sriksrik kamrangko sandiengachim. Indi-  
 ba ua salrango kamko altuae man'jachim.  
 Clerk kam ka'na gita ua office ge'antio-  
 nikon sing'jojoe niaha, indiba clerk kam  
 ka'naba uni leka pora chu'ongjani gimin  
 ua man'jaha. Dokanrango paltingipa dake  
 kam ka'naba ua chanchiahachim, indiba,  
 paltingipako nanggiparangba dongska-  
 jaha. Hotelo mi song'tingipani kamko  
 ua ka'e nioba ua mi song'na changjani  
 gimin unonikoba adita salni ja'manon  
 rikalatako man'aha. Unikoa ua songjin-  
 maoni ong'kate gitimrangona re'ange kuli

kam ka'na chanchiahachim. Indiba ua adita leka pora dongani gimin an'tangko kuli kam ka'na kranikjaha. Uni gimin an'tango je namkala chola donga uko gane mohori kamko ka'na am'aha, unoba mohorini kamkoba man'jaha. Indake janggi tangani mamung chol dongjaha ine nike saksa mandeni noko dongnapeaha. Ua mande una ka'sakchake uko japraako adita tangkako on'na ku'rachake rakiaha. Ua mande uko wak nirikchina a'baona watataha. A'bao wak nirikmitingo ua wakni cha'anirangko cha'pae an'tangko oka'atna am'ahachim, indiba ua man'jaha. Indake duk chaka amchakjae ua pagipani nokchi re'angpilaha.

Pagipa uko salantian sengsoengachim. Ua chitirangko seatjani gimin, an'tangni depantena maiba a'sel ong'aha, ine ua chanchiaha. Indake bi'sa songona sok-bapilon ua gana gri china gri dake re-baahani gimin, aroba uni bimang ding-ahani gimin manderang uko uisotokjaha-chim. Saoba a'gital songona re'baa inesan uamang chanchiaha. Indiba pagipa cher'ao niksoon uko uisoaha aro uko grongna chasoaha. Uamang gronggrikahaon, depante pagipana aganaha, "Anganang'ni on'ata tangka gimikon jara dake bon-



ataha. Da'o anga choligijagipa pante ong'aha. Anga nang'ni depante ine chanako man'na krajaha. Uni gimin angko nang'ni nokolrangoni saksa gita jakkalbo." Indiba pagipa una ka'saahani gimin uko ka'onangjaha aro uko kema ka'e indakesa aganaha, "Na'a siahachim, indiba tangpilaha, aro gimaahachim, indiba anga nang'ko man'pilaha."

Jisu Isolni ka'saako talatna gita ia toaniko aganaha. Iako bilsu hajalsana skangon aganahaoba, Isolni ka'saani gimin talatna an'ching da'aloba ia apsan golpokon agankugenchim. Isol an'chinga ka'sachongmota aro an'chingni paprangko kema ka'a. Beben an'ching mande-rang ong'e basakoba basakoba pagipani nokoni chel'e dongo an'sengbatsusu nike pagipani nokoni ong'kate katronga. Indiba ruutgijan pagipani noko donga gita namja ine an'ching nika. Indake ong'on an'ching Mondoliona, Isolni nokona re'ba-pilna kenna nangja. Ua an'chingko sal-anti nisoe donga, maina Isol ka'saan gap-gipa, ka'onangna ka'singipa, aro ka'sae dakna jaksramgipa ong'a.





**PRINTED AT LAKSHMI PRINTING PRESS, GAUHATI-1**